

者。雖得善趣。仍同未得。如入行論云。「畜亦不難辦。為是小利故。業逼者壞此。難得妙暇滿。」以是此心縱覺難生。然是道基。故應勵力。博朵瓦云。「除我光榮者。即是修習無常。由已了知。定當除去親屬資具等。現世一切光榮。獨自無伴而往他世。除法而外皆無所為。不住現法始得生起。乃至心中未能生此。是乃遮阻一切法道。」鐸巴亦云。「若能兼修積集資糧。淨治罪障。啟禱本尊及諸尊長。並發刻勤殷重思惟。雖覺百年亦不能生。然諸無常不安住故。略覺艱難即得生起。」於迦瑪巴請求另易所緣境時。重述前法。請其後者。則云後者全未能至。

如是自心若能堪任。應如前說而正修習。若不堪者。則隨其所稱。取三根本九種因相。觀現法中所有諸事。猶如臨殺飾以莊嚴。應當乃至意未厭離。數數修習。若經論中何處有說。親近知識暇滿無常諸法品類。皆應了知。是彼彼時所有行持。取而修習。乃能速得諸佛密意。餘處亦當如是了知。

第二思惟後世當生何趣。二趣苦樂者。如是決定速死沒故。於現法中無暇久居。然死而後亦非斷無。仍須受生。此復唯除二趣之外無餘生處。謂生善趣或是惡趣。於彼中生。非

自自在。以是諸業他自在故。如黑白業牽引而生。如是我若生惡趣者。當為何等。故應思惟諸惡趣苦。如龍猛依怙云。「日日恆應念。極寒熱地獄。亦應念飢渴。憔悴諸餓鬼。應觀念極多。愚苦諸旁生。斷彼因行善。瞻部洲人身。難得今得時。勵斷惡趣因。」此中所修生死總苦。惡趣別苦。至極切要。謂若自思墮苦海理。意生厭離。能息傲慢。由見苦是不善果故。於諸惡罪極生羞恥。不樂眾苦故。而樂安樂。由見安樂是善果故。於修善法深生歡喜。由量自心而悲愍他。由厭生死希求解脫。由畏眾苦。發起猛利真皈依等。故是能攝眾多修要大嗚柁南。如是亦如入行論云。「無苦無出離。故心汝堅忍。」又云。「復次苦功德。厭離除憍傲。悲愍生死者。羞惡樂善行。」又云。「我由畏怖故。將自奉普賢。」此諸苦德。入行論中雖依自身已有之苦增上而說。然其當受眾苦亦爾。

以是因緣。思惡趣苦。其中分三。一、思惟地獄所有眾苦。二、旁生所有眾苦。三、餓鬼所有眾苦。初
中分四。一、大有情地獄。二、近邊地獄。三、寒冷地獄。四、獨一地獄。今初

(一)以是因緣思惡趣苦。原譯為前行本之本文。

謂從此過三萬二千踰繕那。下有等活地獄。從此漸隔四千四千踰繕那下。而有餘七。如是八中。初等活者。謂彼有情。多共聚集。業增上故。種種苦具次第而起。互相殘害。悶絕躡

地。次虛空中。發如是聲。汝諸有情可還等活。次復欬起。如前殘害。由是當受無量眾苦。二黑繩者。其中所生諸有情類。謂多當受如是眾苦。諸守獄卒。以黑繩拏。或為四方。或為八方。或為種種非一紋畫。如其所拏。如是以刀。或斫或割。三眾合者。謂彼有情。或時輾轉。而共集會。爾時獄卒驅逐令入。如二孺頭鐵山之間。從此無間兩山合迫。爾時從其一切門中。血流通注。如是如諸羊馬象獅及如虎頭。合迫亦爾。又集會時。驅逐令入極大鐵槽。壓迫全身。如壓甘蔗。又集會時。有大鐵山從上而墮。於鐵地基若斫若剖。若擣若裂。如是等時。血流通注。四號叫者。謂彼有情。尋求宅舍。即便趣入大鐵室中。始纔入已。火便熾起。由是燃燒。五大號叫者。多與前同。其差別者。謂其鐵室層匝有二。六燒熱者。謂彼有情為諸獄卒。置於眾多踰繕那量。極熱燒燃。大鐵鏃中。輾轉燒燔。猶如多魚。熾然鐵鼎。從下貫入。徹頂而出。從口二眼。二鼻。二耳。一切毛孔。猛熾熾生。又置熾然大鐵地上。或仰或覆。以極熾然炎熱鐵椎。或打或築。七極熱者。謂以三尖大熱鐵鼎。從下貫入。左右二鋒。徹左右膊。中從頂出。由是因緣從口等門。猛熾熾生。又以熾然炎熱鐵鏢。遍裹其身。又復倒擲。熾然涌沸。彌滿灰水。大鐵鑊中。其湯涌沸。上下漂轉。若時銷爛。皮肉血脈。唯餘骨髓。爾時漉出。置鐵地上。待其皮肉血脈生已。還

擲鑊中。餘如燒熱。八無間者。謂自東方多百非一踰繕那地。猛火熾然。即從其中騰熖而來。由此漸壞。彼諸有情。皮肉筋骨。直徹其髓。遍身一切。猛熖熾然。燒如脂燭。所餘三方。悉皆如是。四方火來。於彼合雜。所受苦痛。無有間隙。唯因號哭。叫苦聲音。知是有情。又於盛滿熾然。鐵炭大鐵箕中。而為掬簸。又命登下熱鐵地上。諸大鐵山。又從口中拔出其舌。以百鐵釘。釘而張之。令無皺褳。如張牛皮。又置鐵地。令其仰臥。以大鐵鉗。鉗口令開。熾然鐵丸。置其口中。又以烱銅而灌其口。燒口及喉。徹諸腑臟。從下流出。所餘諸苦。如極燒熱。此但略說粗顯苦具。非餘種種眾多苦具而不可得。如有所住住處之量及諸苦等。是如本地分中所說錄出。

此諸大苦。要經幾時而領受者。如親友書云。「如是諸苦極粗暴。雖受經百俱胝年。乃至不善未盡出。爾時與命終不離。」謂其乃至能受業力未盡以來。爾時定須受彼諸苦。此復人間五十歲。是四天王眾天一日一夜。以此三十為一月。十二月為一歲。此五百歲。是四天王眾天壽量。總此一切為一日夜。三十日夜為一月。此十二月為一歲。此五百歲。是為等活地獄壽量。如是人間百歲。二百。四百。八百。千六百歲。如其次第是三十三。乃至他化自在諸天。一日一夜。其壽量者。謂各自天千歲。二千。四千。八千。萬六千歲。如此次第。是從黑繩。乃

至燒熱一日一夜。以各自歲。從千乃至一萬六千。俱舍論云。「人中五十歲。是欲界諸天。下者一日夜。上者俱倍增。」又云。「等活等六次。日夜與欲天。壽等故。彼壽數與欲天同。極熱半無間中劫。」本地分中亦同是義。

近邊者。謂彼八種大那落迦。一一各有四牆四門。其外皆有鐵城圍繞。其城亦復各有四門。一一門外有餘四。四有情地獄。謂煨坑。屍糞臭泥。或穢糞泥。惡臭如屍。利刀道等。無極大河。其中初者。謂有煨煨。沒齊膝許。彼諸有情。為求舍宅。遊行至此。下足之時。皮肉及血。並皆銷爛。舉足之時。皮等還生。第二者。謂即與此無間相鄰。有穢糞坑。臭如死屍。彼諸有情。為求舍宅。遊行至此。顛陷其中。首足俱沒。其糞泥內。多有諸蟲。名曰利柴。穿皮入肉。斷筋破骨。取髓而食。第三者。謂與此泥無間相鄰。有多利刀。仰刃為路。彼諸有情。為求舍宅。遊行至此。下足之時。皮肉筋血。悉皆刺截。舉足之時。復生如故。與此無間。有劍葉林。彼諸有情。為求舍宅。遊行至此。遂趣其陰。纔坐其下。眾多葉劍。從樹而落。斫截其身。一切支節。是諸有情。便即躡地。來諸螿狗。搥掣脊脰。而噉食之。從此無間。有鐵設拉末梨林。彼諸有情。為求舍宅。遊行至此。遂登其上。當登之時。諸刺向下。欲下之時。復迴向上。由是貫刺一切支節。次有大鳥名

(一)搥掣 原文為「搥掣」

曰鐵柴。上彼頭頂。或上其膊。探啄眼睛而噉食之。是等同是刀劍苦害。故合為一。第四者。設拉末梨。無間相鄰。有廣大河。名曰無極。沸熱灰水。彌滿其中。彼諸有情。為求舍宅。墮中煎煮。上下漂沒。如以豆等置大鑊中。以水彌滿。猛火煎煮。其河兩岸有諸獄卒。手執杖索。及以大網行列而住。遮不令出。或以索羈。或以網漉。仰置熾然大鐵地上。問何所欲。彼若答曰。我等今者竟無覺知。然甚飢渴。一便以極熱燒燃鐵丸置其口中。及以烱銅而灌其口。此等皆如本地分說。其中復說近邊。獨一。二中壽量。無有決定。然其能感如是苦業。乃至未盡。爾時即當於如是處。恆受諸苦。

八寒地獄者。謂從八大有情地獄。橫去一萬踰繕那外。是有彼處。即從此下三萬二千踰繕那處。有寒炮獄。次下各隔二千二千踰繕那處。有餘七焉。其中炮者。謂遭廣大寒觸所觸。一切身分悉皆卷縮。猶如瘡炮。炮裂之中。所有差別。謂瘡卷皺。如泡潰爛。噉嘶訖。郝郝凡。虎虎凡者。是以叫苦聲音差別。而立其名。裂如青蓮者。謂遭廣大寒觸所觸。其色青瘀裂五。或六。裂如紅蓮。所有差別。謂過青已。變為紅赤。皮膚分裂。或十或多。裂如大紅蓮。所有差別。謂其皮膚。變極紅赤。分裂百數。或更繁多。如是次第。處所量齊。及諸苦等。皆是依於本地分

說。本生論云。「斷無見者於後世。當住寒風黑暗中。由此能銷諸骨節。誰欲自利而趣彼。」此說住於黑暗之中。弟子書中亦云。「無比嚴寒侵骨力。遍身慄戰而縮屈。百炮起裂生諸蟲。嚼抓脂髓水淋漓。寒迫齒戰毛髮豎。眼耳喉等悉寒逼。身心中間極蒙蔽。住寒地獄苦最極。」

受如是苦經幾時者。謂乃至未盡如是惡業。此又如本地分云。「生寒地獄有情壽量。當知望於諸大有情地獄有情。次第相望各近其半。」俱舍釋中引經說云。「諸比丘。譬如此間摩羯陀國。納八十斛胡麻大篋。以諸胡麻高盛充滿。次若有人經越百歲。取一胡麻。諸比丘。由是漸次容八十斛胡麻大篋。速當永盡。然我不說生寒炮中諸有情壽而能永盡。諸比丘。如二十炮。如是乃為一炮裂量。廣說乃至。又諸比丘。如其二十裂如紅蓮。如是裂如大紅蓮量。其一亦爾。」謂乃至爾許壽量受苦。

獨一地獄者。謂於寒熱地獄近邊。本地分說人間亦有。事阿笈摩亦說住於近大海岸。猶如僧護因緣中說。俱舍釋亦云。「如是十六有情地獄。是由一切有情共業增上而成。獨一地獄。或由眾多或二或一別業而成。此等形相差別非一。處所無定。若河若山。若曠野處。

若所餘處。若於地下。悉皆有故。」如是能感於彼等中受生之因。如下當說。極近易為。於日中亦集多種。先已集者現有無量。是故不應安穩而住。應思此等深生畏怖。與彼中間。唯除隔絕悠悠之息而無餘故。如是亦如入行論云。「已作地獄業。何故安穩住。」親友書亦云。「諸作惡者唯出息。未斷之時而間隔。聞諸地獄無量苦。如金剛性無所畏。見畫地獄及聽聞。憶念讀誦造形相。尚能引發諸恐怖。況諸正受猛異熟。」生死苦中。諸惡趣苦。極難忍受。其中復以地獄諸苦極難堪忍。於一日中。以三百矛。無間猛刺。所有痛苦。於地獄中。微苦少分。亦莫能比。諸地獄中。又以無間苦為至極。親友書云。「如於一切安樂中。永盡諸愛為樂主。如是一切眾苦中。無間獄苦極粗猛。此間日以三百矛。極猛貫刺所生苦。比於地獄輕微苦。非喻非能及少分。」能感如是眾苦之因。唯是自內三門惡行。如是知己。應盡士夫力用策勵。輕微惡行。莫令染著。即前書云。「此諸不善果種子。即身語意諸惡行。汝應盡力而策勵。縱其塵許莫令侵。」

思惟旁生苦者。謂旁生中諸羸劣者。為諸強力之所殺害。又為人天資生之具。自無自在。為他驅馳。遭其傷殺。撻打損惱。本地分說。與諸人天共同依止。無別處所。俱舍釋云。「旁

生謂諸水陸空行。其處根本是謂大海。餘者皆從大海散出。」親友書亦云。「旁生趣中遭殺害。繫縛打等種種苦。諸離寂滅淨善者。互相吞噉極暴惡。有因真珠及毛骨。由肉皮故而死亡。無自在故由他驅。足手鞭鉤及棒打。」其中初頌顯示總苦。其第二頌顯示別苦。言打等中。等攝驅馳及穿鼻等。此是依於由人非人作殺害等。互吞噉者。是約旁生眾同分中。所為損害。寂滅淨善者。謂能證得涅槃善法。遠離此者。顯極愚蒙。不堪道器。從足踢使。至以棒打。而為驅使。五事如次。謂馬。水牛。驢。象。牛等。此等是如親友書釋中所說。其餘尚有生於黑暗。及以水中。老死於彼。負重疲勞。耕耘剪毛。強逼驅使。又以非一。殺害方便。苦惱而殺。又受飢渴。寒暑逼惱。又由獵士。多方惱害。應於此等。常懸畏懼。思惟眾多苦惱道理。厭患出離。其壽量者。俱舍論云。「旁生長經劫。」謂壽長者。能達劫量。短則無定。

菩提道次第廣論卷三終